

10) *IT CAME UPON THE MIDNIGHT CLEAR*

- 1 Yn kler dhe hanter-nos y teuth
 an hengan splann a gloz,
a eledh gans telynnow owr
 war-nans dhe'n byz ow toz;
kres war an nor, bodh da dhe duz,
 a-barth Myghtern an Nev,
rag klewez kenyz aga han
 an byz kosel a sev.
- 2 Ha hwath dre'n ebron drogh y tons
 war dhiwaskell a gres,
ha prest an ilow nevek a
 drez oll an byz anes;
a-ugh y woenyow trist, uvel,
 y nijons nes war-nans,
pup-pryz a-vann dh'y dros kemmysk
 y kan an eledh sans.
- 3 An keudhyow tynn a begh ha strif
 an byz re borthas pell,
yn-dann an son elek rez eth
 dew oez a dhrocter fell;
ha tuz ow kwerrya erbynn tuz,
 ny glewons geryow drez;
A vreseloryon, klewez gwrewgh
 an el ow kana kres.
- 4 An eur a fisten, gans an verdh
 dargenyz seulabryz,
an roz a dermyn a yn-tro,
 hag owrek vydh an pryz,
war oll an byz, pan wrello kres
 yn splannder doz war-nans,
hag oll an byz daskorr an gan
 a sen an eledh sans.

- English words by Edmund Sears, 1849.
- Verses 1, 2, 3 translated by Malcolm Stephens and tidied by Wella Brown.
- Verse 4 translated by Ken George, Christmas 1989.
- Recommended tune: Noel.